



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

ՈՐՈՇՈՒՄ

30 հոկտեմբերի 2025 թվականի թիվ 126-Ա

ք.Երևան

«ՖՐԻ ՆՅՈՒՋ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ նաև՝ Հանձնաժողով), ուսումնասիրելով 2025 թվականի հոկտեմբերի 6-ին իր նախաձեռնությամբ հարուցված թիվ 51 վարչական վարույթի նյութերը, *պարզեց*.

Հանձնաժողովն իր վերահսկողական գործառույթներն իրականացնելիս 2025 թվականի սեպտեմբերի 30-ից հոկտեմբերի 3-ը տեսալսողական մեդիաձառայություն մատուցող «ՖՐԻ ՆՅՈՒՋ» ՍՊ ընկերության (այսուհետ՝ նաև՝ Հեռարձակող կամ Ընկերություն) կողմից հեռարձակվող «ՖՐԻ ՆՅՈՒՋ» տեսալսողական ծրագրի (այսուհետ՝ նաև՝ Ծրագիր) 2025 թվականի սեպտեմբերի 27-ից հոկտեմբերի 2-ն ընկած ժամանակահատվածի տեսագրությունների մշտադիտարկման արդյունքում հայտնաբերել է «Տեսալսողական մեդիայի մասին» օրենքի (այսուհետ՝ Օրենք) 6-րդ հոդվածի 4-րդ մասի դրույթի պահանջի առերևույթ խախտման հատկանիշներ:

Հեռարձակողի գործունեության մշտադիտարկման արդյունքների հիման վրա 2025 թվականի հոկտեմբերի 6-ին Հանձնաժողովի ծրագրերի մոնիտորինգի և վերահսկողության վարչության կողմից կազմվել է տեսալսողական մեդիաձառայություն մատուցողի գործունեության մշտադիտարկման իրականացման և արդյունքների վերաբերյալ արձանագրություն (այսուհետ՝ Արձանագրություն), ըստ որի՝ 2025 թվականի սեպտեմբերի 27-ից հոկտեմբերի 2-ն ընկած ժամանակահատվածում Հեռարձակողի կողմից Ծրագրով եթեր են հեռարձակվել մանկական հաղորդումներ, սակայն չի ապահովվել լսողական խնդիրներ ունեցող սպառողների համար տեղեկատվության մատչելիությունը՝ օրվա ընթացքում չներկայացնելով առնվազն մեկական մանկական հաղորդում հայերեն ժեստերի լեզվով թարգմանությամբ:

Մասնավորապես՝ նշված ժամանակահատվածում հեռարձակվել են «Բլթ-բլթ շոու» մանկական հաղորդումները

27.09.2025թ. ժամը 16:19:31 – 16:31:57,

28.09.2025թ. ժամը 05:27:49 – 05:50:04,

ժամը 11:08:02 – 11:14:55,

29.09.2025թ. ժամը 05:43:58 – 05:56:38,

01.10.2025թ. ժամը 05:33:19 – 05:52:25,
02.10.2025թ. ժամը 05:34:50 – 05:54:20,
ժամը 07:19:38 – 07:32:19:

Օրենքի 42-րդ հոդվածի 18-րդ մասի համաձայն՝ Արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Հանձնաժողովը, հիմք ընդունելով Արձանագրությունը և ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի «բ» կետով, 2025 թվականի հոկտեմբերի 6-ին Հեռարձակողի նկատմամբ հարուցել է թիվ 51 վարչական վարույթը:

Հանձնաժողովը հարուցված վարչական վարույթի մասին 2025 թվականի հոկտեմբերի 07-ին թիվ Ե/04/04.1/784-25 գրությամբ ծանուցել է Հեռարձակողին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Հեռարձակողը նշված գրությանն ի պատասխան 2025 թվականի հոկտեմբերի 8-ին Հանձնաժողով է ներկայացրել պարզաբանում՝ մասնավորապես նշելով՝

«(...) նշված մանկական հաղորդաշարը պատրաստվել է ս.թ. առաջին կիսամյակին բացառապես «Ֆրի Նյուզ» հեռուստաընկերության սեփական միջոցներով՝ առանց արտաքին ֆինանսական աջակցության: Այն դարձել էր սիրված և պահանջված հեռուստաբովանդակություն երեխաների շրջանում, ինչի վերաբերյալ ունեցել ենք բազմաթիվ արձագանքներ և զանգեր հեռուստադիտողներից: Նշենք նաև, որ ներկայում հաղորդումը ժեստերի լեզվով թարգմանությամբ ներկայացնել ցավոք հնարավոր չէ՝ ֆինանսական միջոցների սղության պատճառով, հետևաբար, հաղորդման արտադրությունն ու հեռարձակումը դադարեցված է: Խնդրում ենք հանձնաժողովին, հաշվի առնելով վերոգրյալ հանգամանքները, խախտում կատարելու ոչ դիտարկվող բնույթը և հեռուստաընկերության կողմից ՀՌՀ-ի գրությանն անմիջապես արձագանքելն ու հաղորդումը եթերացանցից հեռացնելը, հանդես բերել ճկունություն և վերանայել որոշումը:»:

Հանձնաժողովի հիմնավորումները (պատճառաբանությունը) և եզրահանգումը.

Վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է.

Օրենքի 2-րդ հոդվածի 1-ին մասը սահմանում է.

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, սույն օրենքը, «Զանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը:»:

Օրենքի 6-րդ հոդվածի 4-րդ մասի համաձայն՝ հեռարձակողները, որոնք եթեր են հեռարձակում նաև մանկական կամ լրատվական տեսալսողական հաղորդումներ և ֆիլմեր, պարտավոր են իրենց ծրագրերում ապահովել լսողության խնդիրներ ունեցող սպառողների համար տեղեկատվության մատչելիությունը՝ օրվա ընթացքում՝ համապատասխանաբար առնվազն մեկական մանկական հաղորդում ներկայացնելով հայերեն ժեստերի լեզվով

թարգմանությամբ, և լրատվական տեսալսողական հաղորդում և ֆիլմ՝ ներկայացնելով ժեստերի լեզվով թարգմանությամբ կամ հայերեն ենթագրով՝ կարգավորող պետական մարմնի սահմանած ժամերին և տեխնիկական նվազագույն պահանջներին համապատասխան:

Հեռուստատեսության և ռադիոյի հանձնաժողովի 2020 թվականի օգոստոսի 28-ի «Լսողական խնդիրներ ունեցող սպառողների համար օրվա ընթացքում համապատասխանաբար առնվազն մեկական մանկական և լրատվական տեսալսողական հաղորդումներ, ֆիլմեր ժեստերի լեզվով թարգմանությամբ կամ հայերեն ենթագրով հեռարձակման եթերային ժամերը սահմանելու մասին» թիվ 82-Ա որոշման (այսուհետ՝ թիվ 82-Ա որոշում) 2-րդ կետի 1-ին ենթակետի համաձայն՝

«2. Տեսալսողական մեդիածառայություններ մատուցողները, որոնք եթեր են հեռարձակում նաև մանկական կամ լրատվական տեսալսողական հաղորդումներ և ֆիլմեր, պարտավոր են իրենց ծրագրերում ապահովել լսողության խնդիրներ ունեցող սպառողների համար տեղեկատվության մատչելիությունը՝ օրվա ընթացքում՝ համապատասխանաբար առնվազն մեկական մանկական հաղորդում ներկայացնելով հայերեն ժեստերի լեզվով թարգմանությամբ, և լրատվական տեսալսողական հաղորդում և ֆիլմ՝ ներկայացնելով ժեստերի լեզվով թարգմանությամբ կամ հայերեն ենթագրով՝ հետևյալ ձևով և եթերային ժամերին.

1) մանկական տեսալսողական հաղորդումները պետք է եթեր հեռարձակվեն աշխատանքային օրերին ժամը՝ 16:00-ից մինչև 21:00-ն, իսկ հանգստյան օրերին՝ 10:00-ից մինչև 17:00-ն ընկած ժամանակահատվածում, ընդ որում հայերեն ժեստերի լեզվով տեսանելի թարգմանությունը պարտադիր է, (...):»:

Օրենքի 32-րդ հոդվածի 1-ին մասի 14-րդ կետի համաձայն՝ Հանձնաժողովն իրականացնում է Հեռարձակողների և օպերատորների գործունեության մշտադիտարկում:

Օրենքի 42-րդ հոդվածի 1-ին մասի համաձայն՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով, իսկ նույն հոդվածի 8-րդ և 9-րդ մասերը սահմանում են՝

«8. Մշտադիտարկման արդյունքներով կարգավորող պետական մարմնի ներկայացուցիչը մշտադիտարկման արդյունքների վերաբերյալ կազմում է արձանագրություն:

9. Մշտադիտարկման արդյունքների վերաբերյալ արձանագրության մեջ նշվում են մշտադիտարկման արդյունքների համառոտ շարադրանքը, ինչպես նաև վարչական վարույթ հարուցելու կամ հարուցված վարչական վարույթի համար էական նշանակություն ունեցող բոլոր փաստական հանգամանքները, այդ թվում՝ վարույթի մասնակիցների օգտին առկա հանգամանքները:»:

Հիմք ընդունելով տեսալսողական մեդիայի բնագավառը կարգավորող օրենսդրությունը, ինչպես նաև վերոգրյալ իրավական հիմնավորումները՝ Հանձնաժողովն արձանագրում է՝

Հեռարձակողը տեսալսողական հաղորդումները հեռարձակելիս պարտավոր էր պահպանել Օրենքում ամրագրված դրույթների պահանջները:

Քննարկվող համատեքստում հատկանշական է, որ Հեռարձակողը 2021 թվականի հունվարի 21-ից (սփռման տարածքը՝ ք. Երևան, լիցենզիայի սերիան, համարը՝ ԵՀ N 298, գործողության ժամկետը՝ 21.01.2021թ.-21.01.2028թ.) հանդիսանում է Հանձնաժողովի կողմից լիցենզավորված իրավաբանական անձ, որը կազմում և սպառողին է ներկայացնում

տեսալսողական տեղեկատվություն և խմբագրական պատասխանատվություն է կրում տեսալսողական արտադրանքի բովանդակության համար:

Հեռարձակողը պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելն առաջացնում է իրավական հետևանքներ, և, ի թիվս այլնի, Հեռարձակողը պատասխանատվություն է կրում տեսալսողական մեդիայի բնագավառը կարգավորող օրենսդրության պահանջների պահպանման և կիրարկման ապահովման համար:

Տվյալ դեպքում Հեռարձակողը պարտավոր էր պահպանել Օրենքի 6-րդ հոդվածի 4-րդ մասով սահմանված դրույթները:

Այսպես, հիմք ընդունելով օրենքների դրույթները և ձեռք բերված փաստերը՝ արձանագրում ենք, որ.

«ՖՐԻ ՆՅՈՒՉ» տեսալսողական ծրագրով 2025 թվականի սեպտեմբերի 27-ից հոկտեմբերի 2-ն ընկած ժամանակահատվածում Հեռարձակողի կողմից եթեր են հեռարձակվել մանկական հաղորդումներ, սակայն չի ապահովվել լսողական խնդիրներ ունեցող սպառողների համար տեղեկատվության մատչելիությունը՝ օրվա ընթացքում չներկայացնելով առնվազն մեկական մանկական հաղորդում հայերեն ժեստերի լեզվով թարգմանությամբ:

Հանձնաժողովը մանրամասն ուսումնասիրել է Հեռարձակողի կողմից ներկայացված պարզաբանումները և բացատրությունները, ըստ որոնց՝ Հեռարձակողը հայտնել է, որ նշված մանկական հաղորդաշարը պատրաստվել է սեփական միջոցներով՝ առանց արտաքին ֆինանսական աջակցության, նաև այն, որ ներկա պահին հաղորդումը ժեստերի լեզվով թարգմանությամբ ներկայացնել հնարավոր չէ ֆինանսական միջոցների սղության պատճառով, իսկ հաղորդման արտադրությունն ու հեռարձակումը դադարեցված է:

Հանձնաժողովն արձանագրում է, որ Հեռարձակողը փաստացի ընդունել է իրավախախտման փաստն առ այն, որ եթեր է հեռարձակել մանկական հաղորդումներ, սակայն չի ապահովել լսողական խնդիրներ ունեցող սպառողների համար տեղեկատվության մատչելիությունը՝ օրվա ընթացքում չներկայացնելով առնվազն մեկական մանկական հաղորդում հայերեն ժեստերի լեզվով թարգմանությամբ:

Այսպիսով, վարչական վարույթի նյութերի ուսումնասիրության և համադրման արդյունքում Հանձնաժողովն արձանագրում է՝ Հեռարձակողի կողմից Ծրագրում հեռարձակվել են մանկական հաղորդումներ, սակայն չի ապահովվել լսողական խնդիրներ ունեցող սպառողների համար տեղեկատվության մատչելիությունը՝ օրվա ընթացքում չներկայացնելով առնվազն մեկական մանկական հաղորդում հայերեն ժեստերի լեզվով թարգմանությամբ՝ չպահպանելով Օրենքի 6-րդ հոդվածի 4-րդ մասի պահանջները:

Օրենքի 32-րդ հոդվածի 1-ին մասի 11-րդ կետի համաձայն՝ կարգավորող պետական մարմինը՝ Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

Օրենքի 55-րդ հոդվածի 1-ին մասի համաձայն՝ կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին

կարգավորող պետական մարմինն գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում,
- 2) տուգանք,
- 3) հեղինակազորման կամ լիցենզիայի գործողության կասեցում,
- 4) հեղինակազորման կամ լիցենզիայի գործողության դադարեցում:

Օրենքի 57-րդ հոդվածի 14-րդ մասը սահմանում է.

«Սույն օրենքի 6-րդ հոդվածի պահանջները խախտելը՝ առաջացնում է տուգանքի նշանակում՝ Հասույթի 0.03 տոկոսի, բայց ոչ պակաս, քան սահմանված նվազագույն աշխատավարձի երկուհարյուրապատիկի չափով:»:

Ելնելով վերոգրյալից, հիմք ընդունելով «Տեսալսողական մեդիայի մասին» օրենքի 2-րդ հոդվածի 1-ին մասը, 6-րդ հոդվածի 4-րդ մասը, 32-րդ հոդվածի 1-ին մասի 11-րդ և 14-րդ կետերը, 42-րդ հոդվածը, 55-րդ հոդվածի 1-ին մասի 2-րդ կետը, ինչպես նաև Հեռուստատեսության և ռադիոյի հանձնաժողովի 2020 թվականի օգոստոսի 28-ի թիվ 82-Ա որոշման 2-րդ կետի 1-ին ենթակետը և ղեկավարվելով «Տեսալսողական մեդիայի մասին» 57-րդ հոդվածի 14-րդ մասով՝ Հեռուստատեսության և ռադիոյի հանձնաժողովը

Ո Ր Ո Շ Ե Ց

1. «ՖՐԻ ՆՅՈՒՋ» ՍՊ ընկերության նկատմամբ կիրառել Օրենքի 57-րդ հոդվածի 14-րդ մասով սահմանված վարչական տույժը՝ տուգանելով 200 000 (երկու հարյուր հազար) ՀՀ դրամի չափով:

2. Սույն որոշումն ուժի մեջ է մտնում այն «ՖՐԻ ՆՅՈՒՋ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հեռուստատեսության և ռադիոյի հանձնաժողով կամ ՀՀ վարչական դատարան:

**ՀԵՌՈՒՍԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. ՀԱԿՈԲՅԱՆ

2025թ. հոկտեմբերի 30
ք.Երևան